

Regelmatig presentere vieër os “Bie Wieze Van Sjpreëke”, in de Trompetter. Vier nuëdige jieëdereë oet om hie aan deel te numme. Doer ´n sjtukske te sjrieve en noa onge sjtond e-mail adres te sjikke, of om ´ns langs te komme op een van os oavende; de 2<sup>e</sup> moandig van de moand om 20.00 oer Schoolstraat 4 in Broenssem.

Wie ´n bieës

Sjeng huppelt wie ´n vuële  
Rondj in zien sjtamcafé  
Hink wie ´ne aap in de gerdiene  
Went heë zuupt is heë doer ee  
Dan blief heë zoepe wie ´n verke  
En wurdt wie ´n kau zoeë zaat  
Sjokkeld wie ´n pospeërd op heem aa  
´t Is dan al soaves laat  
Heem mot heë kotse wie ´ne reiger  
Ieër heë wie inne os in sjloap vilt  
En wurdt wakker mit ene kater  
Der Sjeng deë neet van deëre hilt!  
Wiel Roeselers

De „renbaan“ van Heële

´t Woar i veer en vieftig  
Dizze oavend woar ´t sjoeën weer  
Vier vrung leëpe de Srool op en neer  
De meëdjjes leëpe i de teëge-gesjtelde richting  
´t Droepneëske, ´t roeëd, ´t Hollesj kink,  
Vier koam os zoeë ummer teëge  
En woare allenuj verleëge  
De „renbaan“ uëver der maat  
De Oranje-Nassausjtroat en langs de stasie  
En vier dósjte de meëdjjes neet vroage  
Mit os mit noa der film te goa  
En um hoof nuëge woare de sjtroate verloate  
En ich han mieng vrouw d´r aa uëver geoate  
Jan Halmans

Zoeë vriej wie inne Voegel

Kiek ins inne voegel doeër de loch zjweëve,  
Is dat noe neet ´n teke van de vriejheid in ´t leëve?  
Heë heet de ganse oetgesjtrikte loch vuur zich ligke,  
En soms zal-ste dan waal dinke, aan wat ich noe goan zigke:  
Zoeë vriej wie inne voegel in de windj,  
Is toch neet alleen de dreum van ´n kindj...

Dat wille toch zieëker alle luuj,  
En es ´t kint noch lieëver gistere es huuju!  
Ron Logister.

### Koad

“Woar ’t rokt,  
is och hits”;  
zach Ulesjpiegel  
en heë wermde zich  
aa inne peëdskuttel.

Jan Halmans

### ***‘t Moag wer vreugjoar weëde,***

De letste poor en boerekoeël,  
höb ich oet d’r gaad gehoald,  
en vuur twieë karre mes,  
höb ich vöal geld betaald.

’t Is noe te hoape dat ’t weer,  
’t neet aaf lieët wete.  
Want angesj kan ich de “sjupperie”,  
vuurleupig waal vergeëte.

Ing oer vuurdat ’t duuster weeëd,  
goan ich doa aa beginne.  
’t Is dan óch neet al te sjwoar,  
en ich bin op tied wer binne

noa jieëker veurke wat ich höb gesjupt  
mót ich eëve op de sjup goan hange  
en mót ich mit d’r tesjedook  
d’r voele zjweet ieësj óp goan vange

mar endlich...noa in weëk of twieë,  
dan moagt geer kómme kieke,  
want dan begint mieng geëdje,  
pas ech op get te lieke.

Nog eëve...dan vingt ’t zieëne aa,  
dus loat mich mar geweëde  
d’r winkter doerde lang genóg  
’t moag noe vreugjoar weëde

Thei Janssen

### Kromp en rech

De grotste zurg  
Van politiek Den Haag  
Zunt neet de luuj  
Mer hunne ege maag

’t Zunt krek advokate  
Die verbolge uëver onrech  
Rech moele wat kromp is  
En verkrachte zoeë ’t rech

Wie ene vakbondjsman  
Deë de moel hilt  
Omdat heë ´n baan kriet  
Die heuëm waal gevilt

Of ene geestelikke vader  
De gans in ´t geniep  
Ondanks zien donderpreëke  
De ketjes in ´t duuster kniep

Zoeëwie ene voetballer deë  
Zich lieët fetere vuur zien gole  
Nog naogenetend van  
Ene cocktail van anabole

Of de sjriever deë mit sjerpe pen  
In ´n nieëtelig gedicht  
De maatsjappie verwiet  
Hoe heë zelf aan zondigt?  
Wiel Roeselers

#### Neet houwe of sjloan

Kiek ins wat om dich heër gebuërt,  
Dat zoë get allemoal maag,  
Dat is toch godsgeklaag,  
De welt is neet mieër zoë gekluërd!

Zinloos geweld is aan de orde van de daag,  
´t is geen oeëtzonjering mieër,  
Nee, de gevalle gruije gesjtaag  
Mér woeërom vroag ich mich jieëdere kieër?

De dreiging van ´t terrorisme is ooch zoë get,  
Wat dinke ze doa mit te berieke?  
Plooië kinne ze doomit neet gladsjtrieke,  
´t wurd alleen mar erger, mér kumt waal in de gezet!

Ooch op angere maneere beriek-ste publiciteit,  
Doeër de boodsjap vredelevend oeët te drage,  
Kweek-ste mieër begrip, dat is ´n feit!

Doarom dizze oproop aan jieëdere:

Sjtaak ´t geweld, ´t heët gene zin,  
´t is tied vuur ´n nuuj begin!  
Alleen same sjtond vieër sjterk,  
Dus neet houwe of sjloan,  
Mér ´t gesjprek aan goan!  
Ron Logister.

#### De pil...!

Kappes, andief en sjerziebuëntjes,  
vleesjtomate, Brussels lof en sjlaat

dat is allemoal zoad van pille,  
die ich gezieënd höb in d'r gaad

Ich lek d'r zoevöal in ing voor,  
zoe-es ich plentjes höbbe wil,  
kiek...dat is noe 't vuurdeel,  
bei 't gebroeke van de pil.

Vreuger houwe de mieëtste miensje,  
inne sjtal vól kinger om zich hin  
en de welt vroeg óp 't letste  
woeë mó't ich mit die miensje hin?

Wie "de pil" woar oetgevónge,  
vuur hoeshouwelek gebroek,  
woare alle jónge vrouwe,  
inins baas in ege boek.

Dartig joar zunt noe verlope,  
en noe gebroeke **vier** de pil,  
en...die goa ich zoevöal legke,  
es ich plentjes höbbe wil.

Thei Janssen

#### Vreugjoar

Went de magnolia's  
oetbundig sjtond te bluije.  
En in azalea en rododendron  
de knoop beginne te gruije.  
Aan beuke, wie veënkes,  
de nuje bleëdjies komme.  
De hosta's hun bleër ontrolle  
en varens zich ontkromme:  
De zon de eërd raakt,  
vuurzichtig mit werme handj.  
Dan zou ich 't oet kinne sjrieëwe:  
"t Vreugjoar is in 't landj!"

Wiel Roeselers

#### Vuëgelke

Ich vóng ing gans kling vuëgelke  
ich weet neet wat vuur soat,  
't hou get aan ing vluëgelke,  
't loog bie ós op sjtroat.

Ich zette d'r get bie,  
get vuur te drinke , en allich...  
woare v'r hieël blie,  
't vuëgelke en ich

Thei Janssen

### Muëderke

Moeëder, muëderke, mam  
Sjravele, wirke, zurge  
Joar in joar oet  
Guster, huu en murge  
Zonger beheij, kleen geluk  
'n Treuënke, sjtil verdreet  
Geen groeëte moel, waal mood  
Muëderke vergeet ich neet  
Wiel Roeselers

### Smurges

Smurges a gen dusj mit ee teske kaffe  
Sjnap ich mich de gezet  
Op 't iësjte blad sjteet politiek  
Mit de ongelukke der tussje  
En, um get mit te kalle  
Kiek ich, wat de jonge gemakt hont mit voetballe  
Bei de doeëdsberigte zoog ich sjtoa  
Miene vrunk is neet mieë doa  
Der jong is os vuurgood ontvalle  
Ongertussje dinks te a der kingertied  
Wie veul zint vier al kwiet  
Kotter en kotter bei kunt der daag  
Dat och ich vertrekke maag  
Jan halmans

### Sjinkske

Oppe toafel ligt 'n sjinkske  
In broen en donkerroeëd  
Der neëve 't metske  
En 'n knepke broeëd  
Mosterd op 't zjwartbroeëd  
Metske in de sjink  
't Water lup mich in de mondj  
Went ich doa aan dink  
Wiel Roeselers

### 't Vuurjoar

Es de lange en donkere daag tot het verlede behuëre,  
En de natuur kriet weer langzaam zien vertroewde kluëre.  
Es dan ooch 't zunneneke weer begint te sjiene,  
En de natuur gans ophuërt mit griene.  
Es dan ooch de blumkes weer beginne te bluije,  
Dan dont vier os weer vruije!  
Dan heët 't vuurjoar 't van d'r wintjer gewonne,  
Dan is 't vuurjoar gelukkig weer begonne!  
Dat gieëf de luuj toch weer extra mood,  
Jao dat kin-ste merke aan dien blood!  
En doeër dat 't dich dan beëter geet,  
Kin-ste ooch ins afsjakele van dien ege leed!

Ron Logister

### De erfsjaf

't Hoes van de tant Anna  
hingt vól mit sjilderieie  
sjtilleëves, sjtadsgezichte,  
muëles en boedereie.

Óp zulder heët zie 'n keëmerke  
dat hingt vól aan alle kante  
Zie is óch nog bei ing sjilderskloep  
dat zunt hōar geestverwante.

Ich vroeg aan de tant Anna  
wat kos zoeë'ing deuksjke mich?  
Ne Theike, zag tant Anna toen..  
dat is vōal te duur vuur dich

Ich verkoop mien deuksjkes neet,  
want geld han ich genóg  
en sjtraks zunt ze allemoal eëve duur  
zoe-es de wirke van van Gogh

Ich wacht noe mar tót 't moment  
dat tant oos geet verloate  
ich kan dan mit de ópbrings van heur wirk  
de cente rolle loate....

Thei Janssen

### Vuurjoar

De knoop van de beum,  
die sjtoan op sjpringe.  
Doe huërs de vuëgel,  
dat ze kloarder zinge.  
De zon heur sjtroale,  
beginne dich te winke.  
In frisj greun,  
zuus-te narcisse kup blinke.  
't Water van de viever,  
wurdt langzaam kloar.  
Doe veuls 't komme,  
't vuurjoar!

Wiel Roeselers

### **Antonius**

V'r wole ins noa Heële vare  
't Fien en ich, op ós gemak,  
Ich hou de vuurduur al gesjloate,  
d'r hōnk loag in de kófferbak.

Wat mich nog noeëts woor ueverkómme,  
gebuurde mich deë daag,

“hüb ’s doe de sjluëtele Fien ? “  
Nou nou, dat woar mich toch ing vroag...

Antonius woeëd aagerope,  
want de duur die woor op sjlot,  
mar...weer wörpt noe zoeë vreug al,  
de duur touw achter zieng vót?

Doa sjtónge v’r dan te kieke,  
s ’mörgesvreug , nog vuur tieën oer,  
de tied die ging versjtrieke,  
dus dat woeëd inne ganse toer.

Antonius loot nieks van zich hure,  
dat woor dem waal egaal,  
toen zag ich teëge ’t Fientje,  
v’r vare ins noa ’t sjpetaal.

Ós Antje dat och inne sjluëtel riek is,  
wirkt bie de begiene doa,  
en wen wier doa teëge haof elf kómme,  
höbbe die mesjien de kaffe kloar.

Ze zoate doa allemoal te sjafte,  
v’r veulde ós doa toes,  
mar ’t wiechtigste van dit verhoal...,  
v’r kóste wer in ós ege hoes.

Éé dink hüb ich doa van ónthaote  
Werp neet dierek get in ’t sjlot  
Antonius deë helpt neet ummer,  
Dus...werp noeëts get touw achter dieng vót.

Thei Janssen

Verlange noa de zon  
Ich kin verlange noa de zon  
Ich sjrieëw ´t soms oet  
Went al die wintjerkou  
Deë reëge, ich houd ´t soms neet oet  
Ich wil mich weer kinne werme  
Kinne werme aan de zon  
Lekker mit ´n book en ´n pilske  
Achter op mien balkon

Wiel Roeselers

Wiesheed.  
Wen d’r haan neet krieënt vuur ’t oavendroeëd,  
gieëft ’t reëge, of d’r haan is doeëd.

Thei Janssen

### **Sjpreëkwuërd**

Deë hat der voeëgel aafgesjoate

Een bok schieten

Went sjtront mis wurdt, lieët heë zich vare

Iemand die van niets iets wordt kent zijn oude vrienden  
niet meer

Die hat vussjeblood

Een vrouw die het altijd koud heeft

Doa vilt mich de boks van oet

Dan breekt mijn klomp

---

Heemkunde ver. Bron v. Brunsham: Schubertstraat 6 6444 BB Brunssum

([secretaris@heemkundebrunssum.nl](mailto:secretaris@heemkundebrunssum.nl))

Dialectgroep: Folkloriada 15 6441 DW Brunssum ([w.roesellers@hetnet.nl](mailto:w.roesellers@hetnet.nl))

Website : [www.heemkundebrunssum.nl](http://www.heemkundebrunssum.nl)